



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Sumáriu Kazu**  
**Tribunál Distritál Oekusi**  
**Jullu 2019**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

**A. Sumáriu prosesu julgamentu kazu iha Tribunál Distritál Oekusi**

**1. Totál kazu ne'ebé JSMP monitoriza: 16**

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	9
Artigu 145 (KP), konjuga ho artigu 2, 3, no 35(b) no 36 (LKVD) no artigu 157 KP	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika no measa	1
Artigu 179 (KP)	Abuzu seksuál ba ema ne'ebé labele reziste ho agravasaun	1
Artigu 316 (KP)	Kontrabandu	4
Artigu 259 (KP)	Danu agravadu	1
<b>Totál</b>		<b>16</b>

**2. Totál desizaun ne'ebé JSMP monitoriza : 16**

Tipu desizaun	Númeru
Pena prizaun (Artigu 66 KP)	1
Suspensaun ba prizaun nia ezekusaun (Artigu 68 KP)	12
Pena multa (Artigu 67KP)	1
Pena admoestasaun (Artigu 82 KP)	1
Izensaun ba pena (Artigu 318 KP)	1

<b>Totál</b>	<b>16</b>
--------------	-----------

**3. Totál kazu sira ne'ebé adia tuir JSMP monitorizasaun : 0**

<b>Razaun adiamentu</b>	<b>Númeru</b>
<b>Totál</b>	<b>0</b>

**4. Total kazu sira ne'ebé kontinua prosesu tuir JSMP nia monitorizasaun : 0**

**B. Deskrisaun sumáriu julgamentu ba desizaun kazu sira**

**1. Krime ofensa ba integridade fízika simples ho natureza violénsia doméstika**

Nú. Prosesu : 0107/18.OESIC  
 Kompozisaun Tribunál : Singulár  
 Juis : Dr. João Ribeiro  
 Prokuradór : Dr. Mateus Nessi  
 Defeza : Dr. Marcelino Marques Coro  
 Desizaun : Pena prizaun tinan 1 fulan 6 suspende ba tinan 1 fulan 6

Iha 08 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MP hasoru nia feen bo'ot (LC) no nia feen ki'ik (LM), iha Distritu Oekusi.

**Akuzasaun Prokuradór**

Prokuradór akuza katak iha 12 Juñu 2018, maizumenus iha oras tuku 15:00 lorokraik, arguidu ho lezada LC diskute malu tanba lezada nia aman mai vizita sira maibé arguidu la hasee lezada nia aman ne'e. Hafoin ida-ne'e arguidu foti hare saku ki'ik ida no tuda kona iha lezada LC nia ulun, tuku dala ida iha lezada nia hasan parte loos no tebe dala ida iha hasan parte karuk.

Iha tempu hanesan, lezada LM tenta ba salva lezada LC maibé arguidu foti batar futun ida no tuda kona iha lezada LM nia kanotak parte karuk. Hafoin arguidu rakut lezada LM nia fu'uk no foti ai-sanak baku dala haat iha lezada LM nia kotuk laran. Agresaun hirak ne'e rezulta lezada LM no LC sofre bubu, metan no moras iha ulun, hasan, kanotak no kotuk laran. Depoisde akontesementu ne'e lezada sira ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa ho forma krime iha konkursu tuir artigu 35 KP no konjuga ho artigu 2, 3(a), 35(b) no 36 LKVD.

**Produsaun prova sira**

Iha julgamentu, arguidu konfesa faktu hotu iha akuzasaun no deklara katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu arrepende ninia hahalok no promete sei la halo tan hahalok hanesan hasoru lezada sira iha futuru. Arguidu deklara tan katak depoisde akontesimentu, arguidu ho lezada sira dame malu no kontinua hela hamutuk iha uma ida to'o agora. Arguidu

mós primeiravés halo krime hasoru lezada sira no mai hatan iha tribunál. Arguidu iha oan na'in ualu husi feen na'in rua ne'e.

Tribunál decide la rona ona deklarasaun lezada sira nian tanba arguidu konfesa integralmente ba faktu sira iha akuzasaun.

### **Alegasaun final**

Prokuradór konsidera arguidu provadu halo agresaun fízika hasoru nia feen sira bazeia ba arguidu nia konfisaun. Prokuradór haktuir liutan katak tuir loloos arguidu mak tenke proteje lezada sira no sente kontente tanba lezada sira nunka iha problema maski hela hamutuk iha uma ida. Bazeia ba razaun sira ne'e, husu ba tribunál atu kondena arguidu tuir moldura penál ne'ebé regula ona iha artigu 145 KP.

Enkuantu defeza haktuir katak arguidu konfesa integralmente ba faktu sira iha akuzasaun, arrepende ninia hahalok, dame malu ona ho lezada sira, kolabora ho tribunál. Arguidu mós promete sei la halo tan krime hasoru nia membru família ka ema seluk iha futuru. Bazeia ba sirkunstánsia sira ne'e hotu, defeza husu ba tribunál atu aplika pena ne'ebé adekua ba arguidu.

### **Desizaun**

Depoide tetu faktu sira hotu, tribunál prova katak arguidu tuda lezada nia ulun ho saku hare ki'ik ida, tuku dala ida iha hasan parte loos no tebe dala ida iha hasan parte karuk. Tribunál mós prova mós katak arguidu tuda lezada LM nia kanotak parte karuk ho batar futun ida, rakut lezada LM nia fu'uk no uza ai-sanak baku dala haat iha lezada LM nia kotuk laran.

Konsidera sirkunstánsia atenuante sira hanesan arguidu konfesa, arrepende ninia hahalok, dame malu ona ho lezada sira, foin primeiravés halo krime, laiha rendimentu fixu kada fulan no promete katak sei la repete ninia hahalok iha futuru, nune'e tribunál konklui prosesu ne'e no kondena arguidu ho pena prizaun tinan ida fulan neen suspende nia ezekusaun ba tinan ida fulan neen.

## **2. Krime ofensa ba integridade fízika simples ho natureza violénsia doméstika**

Nú. Prosesu : 0062/18.OEBCN  
Kompozisaun Tribunál : Singulár  
Juis : Dr. João Ribeiro  
Prokuradór : Dr. Mateus Nessi  
Defeza : Dr. Calisto Tout  
Desizaun : Pena prizaun tinan 1 suspende ba tinan 1

Iha 08 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ALC hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 09 Outubru 2018, maizumenus iha oras tuku 19:00 kalan, arguidu ho lezada diskute malu kona-ba haruka lezada atu ba ko'a hare hafoin arguidu basa dala rua iha

lezada nia hasan parte karuk no rezulta bubu, mean no moras. Depoisde akontesementu ne'e, lezada ba halo tratamentu iha sentru saúde.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'os tinan 3 prizaun ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa integralmente ba faktu sira hotu iha akuzasaun no deklarata katak arguidu arrepende ninia hahalok, di'ak malu ona ho lezada no moris hamutuk fali ona ho lezada hanesan feen ho la'en. Arguidu mós foin primeiravés halo krime hasoru lezada no mai hatan iha tribunál, nu'udar to'os-na'in ne'ebé laiha rendimentu fixu kada fulan no iha oan na'in tolu.

Tribunál presinde atu la rona deklarasaun lezada nian tanba arguidu konfesa integralmente ba faktu sira hotu iha akuzasaun.

### **Alegasaun finál**

Prokuradór konsidera arguidu provadu komete krime hasoru lezada tuir faktu sira iha akuzasaun bazeia ba arguidu nia konfisaun. Maski arguidu mós di'ak malu ona ho lezada, maibé haree ba realidade katak krime violénsia doméstika akontese barak liu iha Rejiaun Oekusi kompara ho munisípiu sira seluk, nune'e husu ba tribunál atu kondena arguidu tuir moldura penál ne'ebé deskreve ba krime ne'ebé akuza ba arguidu.

Entretantu, defeza husu ba tribunál atu kondena arguidu ho pena ne'ebé adekuaudu tanba arguidu konfesa integralmente ba faktu sira, arrepende ninia hahalok no kolabora di'ak ho tribunál. Arguidu mós di'ak malu ona ho lezada, fo'in primeiravés halo krime hasoru lezada no mai hatan iha tribunál.

### **Desizaun**

Tribunál prova katak arguidu basa dala rua iha lezada nia hasan parte karuk. Tribunál konsidera arguidu halo agresun ne'e hasoru feto ne'ebé laiha forsa atu defende nia-an. Bazeia ba prova no konsiderasaun ne'e inklui tetu ba arguidu nia arrependimentu, primeiravés mai hatan iha tribunál, di'ak malu ona ho lezada, iha oan na'in tolu no laiha rendimentu fixu, tribunál konklui prosesu ne'e no kondena arguidu ho pena prizaun tinan ida suspende nia ezekusaun ba tinan ida.

### **3. Krime ofensa ba integridade fízika simples ho natureza violénsia doméstika**

Nú. Prosesu	: 0209/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Calisto Tout
Desizaun	: Pena prizaun tinan 1 fulan 6 suspende ba tinan 1 fulan 6

Iha 08 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CIH hasoru nia bin (BH), iha Distritu Oekusi.

### **Akuzasaun Prokuradór**

Prokuradór akuza katak iha 06 Dezembru 2018, maizumenus iha oras tuku 15:00 lorokraik, arguidu tebe dala ida iha lezada nia kanotak, buti dala ida iha kakorok no tuku dala barak iha ulun. Aktu hirak ne'e rezulta lezada hetan bubu, metan, mean no moras iha kanotak, kakorok no ulun. Hafoin akontesimentu ne'e, lezada ba halo tratamentu médiku iha PRADET. Aleinde anexa mós relatóriu médiku husi PRADET, fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa no konjuga ho artigu 2, 3(d), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu mós deklara katak foin primeiravés halo krime no mai hatan iha tribunál no mós promete sei la halo tan agresaun ruma hasoru lezada. Mezmu nune'e, arguidu seidak di'ak malu ho lezada tanba depoisde akontesimentu lezada kedas sai husi uma. Arguidu hatutan katak nia nu'udar estudante, laiha rendimentu no lezada mak sustensa nesesidade uma laran nian antes problema akontese.

Aleinde ne'e, lezada kontinua konfirma faktu sira iha akuzasaun no deklara katak antes akontesimentu ne'e, sira hela hamutuk no lezada mak tau matan ba arguidu nia nesesidade. Lezada hatutan katak nia hakarak dame malu ho arguidu maibé arguidu mak la ba buka lezada nu'udar nia bin atu dame malu.

### **Alegasaun final**

Prokuradór konsidera arguidu provadu prátika krime tuir faktu sira iha akuzasaun no konsidera arguidu ninia hahalok ne'e hatudu katak arguidu laiha edukasaun no la respeita lezada nu'udar bin. Tanba ne'e husu ba tribunál atu kondena arguidu tuir moldura penál iha artigu 145 KP.

Entretantu defeza husu ba tribunál atu kondena arguidu ho pena ne'ebé adekua tanba arguidu konfesa integralmente ba faktu sira, arrepende ona ninia hahalok no promote sei la halo tan krime hasoru lezada iha futuro. Arguidu mós foin primeiravés halo krime no mai hatan iha tribunál.

### **Desizaun**

Tribunál prova katak halo agresaun hasoru lezada nu'udar nia bin ho meiu sira hanesan; tebe dala ida iha kanotak, buti dala ida iha kakorok no tuku dala barak iha ulun. Lezada nu'udar arguidu nia bin rasik ne'ebé tuir loloos arguidu tenke respeita no defende bainhira ema seluk atu halo krime hasoru lezada. Aleinde ne'e, tribunál prova katak lezada mak sustenta arguidu nia nesesidade loron-loron nian.

Bazeia ba faktu provadu sira ne'e no tetu ba sirkunstánsia sira hotu ne'ebé haleu iha krime ne'e, tribunál kondena arguidu ho pena prizaun tinan ida fulan neen no suspende nia ezekusaun ba período hanesan.

### **4. Krime kontrabandu**

Nú. Prosesu : 0229/17.OESIC  
Kompozisaun Tribunál : Koletivu

Juis : Dr. João Ribeiro, Dra. Sribuana da Costa, Dr. Yudi Pamukas,  
Dra. Alexandre E. Brige Viega (Juisa Mentor)  
Prokuradór : Dr. Mateus Nessi  
Defeza : Dr. Marcelino Marques Coro  
Desizaun : Pena prizaun tinan ida maibé izensaun ba pena

Iha 10 Julu 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Venancio Lafo hasoru Estadu RDTL iha, Distritu Oekusi.

### **Akuzasaun Prokuradór**

Prokuradór akuza katak iha 20 Dezembru 2017, maizumenus iha oras tuku 23:30 kalan, arguidu hatama gasolina litru 105 no gazoel litru 560 ilegalmente liuhusi Noel Ekát entre fronteira Indonezia ho Timor-Leste. Arguidu prátika krime ne'e no disvia-an atu la selu taxa ba iha Diresaun Alfandega nune'e hamosu prejuizu ba Estadu.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

### **Produsaun ba prova sira**

Iha prosesu julgamentu, arguidu konfesa faktu sira iha akuzasaun. Maske nune'e arguidu deklar katak arguidu laiha intensaun atu hatama sasan sira ne'e ilegalmente mai Timor-Leste maibé tanba arguidu hetan konsola husi sidadaun Indonézia ida iha merkadu fronteira nian ne'ebé faan baratu mina sira ne'e. Arguidu deklar katak foin primeiravés hatan iha tribunál, arrepende ninia hahalok no promete sei la repete nia hahalok ne'e iha futuro. Arguidu aumenta katak depoisde akontesimentu ne'e arguidu ho vontade rasik selu kedas taxa liuhusi konta bankária Ministériu Públiku nian. Arguidu serbisu hanesan to'os na'in laiha rendimentu fixu kada fulan no iha oan na'in tolu.

Tribunál decide la rona ona depoimentu testemuña hosi Unidade Polísia Fronteira (UPF) tanba arguidu konfesa faktu hotu ne'ebé prokuradór akuza.

### **Alegasaun final**

Prokuradór konsidera arguidu provadu komete krime kontrabandu tuir faktu sira iha akuzasaun tanba arguidu konfesa integralmente. Tanba ne'e husu ba tribunál atu kondena arguidu tuir moldura penál husi krime ne'ebé akuza ba nia.

Entretantu defeza husu ba tribunál atu fó pena ne'ebé kmaan ba arguidu tanba arguidu konfesa no antes kazu ne'e halo julgamentu, arguidu selu ona taxa ba estadu liuhusi Ministériu Públiku nia konta bankária. Arguidu mós arrepende ninia hahalok, promete sei la repete tan nia hahalok iha futuro no arguidu rasik laiha rendimentu fixu no iha oan tolu.

### **Desizaun**

Tribunál konsidera arguidu provadu hatama mina gazoel no gasolina ilegalmente no la selu taxa ba Estadu. Tribunál mós prova katak depoisde akontesimentu ne'e arguidu ho nia vontade rasik selu kedas taxa ba sasan ilegál hirak ne'e ba Estadu liuhusi Ministériu Públiku nia konta bankária. Aleinde ne'e, tribunál mós prova katak arguidu laiha intensaun atu hola sasan no

hatama mai Timor-Leste maibé tanba arguidu hetan konsola husi sidadaun Indonézia ne'ebé faan baratu mina sira ne'e ba arguidu.

Bazeia ba faktu provadu sira no tetu ba sirkunstánsia hotu-hotu ne'ebé asosiadu ho krime ne'e, tribunál konklui no kondena arguidu ho pena prizaun tinan ida maibé tribunál decide aplika izensaun ba pena tuir artigu 318 KP tanba arguidu ho voluntariamente selu ona taxa ba Diresaun Alfandega liuhusi Ministériu Públiku nia konta bankária.

## **5. Krime kontrabandu**

Nú. Prosesu : 0235/17.OESIC  
Kompozisaun Tribunál : Koletivu  
Juis : Dr. João Ribeiro, Dra. Sribuana da Costa, Dr. Yudi Pamukas,  
Dra. Alexandre E. Brige Viega (Juisa Mentor)  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 suspende ba tinan 1 ba kada arguidu

Iha 10 Jullu 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Mateus Bobo, arguida Marta Punef no Elisabeth Oqui hasoru Estadu RDTL, iha Distritu Oekusi.

### **Akuzasaun Prokuradór**

Prokuradór akuza katak iha 14 Dezembru 2017, maizumenus iha tuku 06:00 dadeer, iha fronteira Poto RAEOA, arguidu no arguida sira hatama gazolina litru 385 no gazoel litru 359 ilegálmamente no la selu taxa ba estadu liuhusi Diresaun Alfandega. Arguidu no arguida sira nia hahalok ne'e hamosu prejuizu ba Estadu.

Prokuradór akuza arguidu no arguida sira kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

### **Produsaun ba prova sira**

Iha julgamentu, arguidu no arguida sira konfesa integralmente ba faktu sira iha akuzasaun prokuradór nian no deklara katak arrepende sira ninia hahalok. Arguidu sira mós promete sei la repete hahalok hanesan iha futuru. Arguidu no arguida sira haktuir tan katak hafoin akontesimentu ne'e, sira selu ona taxa ba sasan sira ne'ebé sira lori tama mai Timór liuhosi Ministériu Públiku nia konta bankária.

Tribunál decide la rona testemuña sira hosi Unidade Polísia Fronteira (UPF) tanba arguidu no arguida sira konfesa integralmente ba faktu hotu iha akuzasaun.

### **Alegasaun finál**

Prokuradór konsidera arguidu no arguida sira provadu komete krime kontrabandu tuir faktu sira iha akuzasaun. Tanba ne'e, husu ba tribunál atu kondena arguidu no arguida sira ho pena tuir artigu 316 KP ne'ebé regula kona-ba krime kontrabandu.

Entretantu defeza husu ba tribunál atu aplika pena ne'ebé kmaan ba arguidu no arguida sira tanba sira konfesa integralmente ba faktu sira iha akuzasaun no arrepende sira ninia hahalok. Aleinde ne'e arguidu sira mós kolabora di'ak ho tribunál no recupera ona prejuizu estadu nian tanba selu ona taxa liuhusi Ministériu Públiku nia konta bankária.

### **Desizaun**

Depoide avalia faktu sira hotu, tribunál prova katak arguidu no arguida sira hatama gasolina litru 385 no gazoel litru 359 ilegalmente ka la selu taxa ba estadu liuhusi Alfandega. Tribunál tetu mós ba sirkunstánsia ne'ebé hakmaan arguidu sira katak arguidu no arguida sira foin primeiravés halo krime no recupera ona prejuizu ne'ebé estadu hetan.

Bazeia ba faktu provadu sira refere no sirkunstánsia sira ne'ebé asosiadu iha krime ne'e, tribunál kondena kada arguidu no arguida sira ho pena prizaun tinan ida suspende ba tinan ida.

### **6. Krime kontrabandu**

Nú. Prosesu : 0037/18.OESIC  
Kompozisaun Tribunál : Koletivu  
Juis : Dr. João Ribeiro, Dra. Sribuana da Costa no Dr. Yudi Pamukas  
Dra. Alexandre E. Brige Viega (Juisa Mentor)  
Prokuradór : Dr. Mateus Nessi  
Defeza : Dr. Marcelino Marques Coro  
Desizaun : Pena prizaun tinan 1 suspende ba tinan 1 ba kada arguidu

Iha 11 Jullu 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Adito Name, Ananias Caet, Cristaforos Crisantos Elo no Francisco Auni hasoru Estadu RDTL, iha Distritu Oekusi.

### **Akuzasaun Prokuradór**

Prokuradór akuza katak iha 09 Marsu 2018, maizumenus iha oras tuku 19:30 kalan, arguidu sira hamutuk hatama ilegalmente gasolina ho volume litru 410, gazoel litru 115, adubu (*pupuk*) mean saku 16, adubu metan saku 9 no mutin saku 19 liuhusi fronteira Saben entre Timor-Leste ho Indonézia. Arguidu sira nia hahalok ne'e hamosu prejuizu ba Estadu tanba la liuhusi Diresaun Alfandega hodi selu taxa.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

### **Produsaun ba prova sira**

Iha prosesu julgamentu, arguidu sira konfesa faktu hotu iha akuzasaun no arrepende sira ninia hahalok. Arguidu sira mós deklara katak selu ona taxa ba sasan ilegal hirak ne'e liuhusi Ministériu Públiku nia konta bankária. Arguidu sira promete sei la repete tan hahalok hanesan iha futuro no foin primeiravés mai hatan iha tribunál.

Tribunál presinde atu la rona ona testemuña husi UPF nia depoimentu tanba arguidu sira konfesa integralmente ba faktu sira iha akuzasaun.



## **Alegasaun finál**

Prokuradór konsidera arguidu sira provadu komete krime kontrabandu tuir faktu sira iha akuzasaun bazeia ba arguidu sira nia konfisaun integralmente. Tanba ne'e, husu ba tribunál atu kondena arguidu sira tuir pena iha artigu 316 KP.

Entretantu defeza husu ba tribunál atu fó pena ne'ebé kmaan ba arguidu sira tanba arguidu sira konfesa, arrepende sira nia hahalok no selu ona taxa ba sasan ilegál hirak ne'e. Arguidu sira mós laiha rendimentu fixu no nu'udar responsável prinsipál ba sira nia família.

## **Desizaun**

Depoizde tetu ba faktu sira hotu, tribunál prova katak arguidu sira hamutuk hatama ilegalmente gazolina lirtu 410, gazoel lirtu 115, adubu (*pupuk*) mean saku 16, adubu metan saku 9 no mutin saku 19. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende sira nia hahalok, foin primeiravés hatan iha tribunál no laiha rendimentu fixu, nune'e, tribunál kondena kada arguidu ho pena prizaun tinan ida suspende tinan ida.

## **7. Krime kontrabandu**

Nú. Prosesu : 0033/17.OESIC  
Kompozisaun Tribunál : Koletivu  
Juis : Dr. João Ribeiro, Dra. Sribuana da Costa no Dr. Yudi Pamunkas  
: Dra. Alexandre E. Brige Viega (Juisa Mentor)  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 suspende tinan 1 ba kada arguidu

Iha 11 Jullu 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Filomena Bobo, Francisca Eco no arguidu Jose Caet no Bento Oqui hasoru Estadu RDTL, iha Distritu Oekusi.

## **Akuzasaun Prokuradór**

Prokuradór akuza katak iha 20 Feveiru 2017, maizumenus oras tuku 05:00 dadeer, arguida no arguidu sira hamutuk hatama sasan ilegál liuhusi fronteira iha Poto. Sasan sira ne'e mak hanesan gazolina hamutuk 170 litru, gazoel 280 litru, mina rai 105 litru no *adubu* (*pupuk*) saku rua. Arguidu sira nia hahalok ne'e fó prejuizu ba Estadu tanba la selu taxa liuhusi Diresaun Alfandega.

Prokuradór akuza arguida no arguidu sira kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

## **Produsaun ba prova sira**

Iha julgamentu, arguidu no arguida sira konfesa faktu hotu iha akuzasaun no deklara katak arrepende ona sira ninia hahalok. Arguidu no arguida sira mós deklara katak sira selu ona taxa liuhusi Ministériu Públiku nia konta bankária ba sasan ilegál sira ne'ebé sira hatama, foin primeiravés hatan iha tribunál no promete sei la repete hahalok hanesan iha futuru. Arguidu sira hanesan negociante ki'ik ne'ebé laiha rendimentu fixu ba kada fulan.

### **Alegasaun finál**

Prokuradór konsidera katak arguidu no arguida sira hatene katak hatama sasan sein selu taxa ne'e kontra lei maibé nafatin halo. Tanba ne'e, arguidu no arguida sira provadu komete krime kontrabandu. Ho konsiderasaun sira ne'e, husu ba tribunál atu kondena arguidu no arguida sira tuir moldura penál ne'ebé previstu iha artigu 316 hosi KP.

Entretantu defeza husu ba tribunál atu aplika pena ne'ebé kmaan ba arguidu no arguida sira tanba sira konfesa, arrepende ona sira nia hahalok no promete sei la repete hikas sira nia hahalok iha futuru. Arguida sira mós hatudu kolaborasaun di'ak ho tribunál no sira mak sustentadór ba família.

### **Desizaun**

Tribunál prova katak arguidu no arguida sira provadu hatama gazolina litru 170, gazoel lirtu 280, mina rai litru 105 no *adubu* (pupuk) saku rua ho ilegál. Maibé antes kazu ne'e tama ba tribunál arguidu no arguida sira selu ona taxa ba sasan sira ne'e iha Ministériu Públiku nia konta bankária. Bazeia ba faktu sira ne'e no tetu mós sirkuntánsia atenuante sira hanesan primeiravés sira halo krime ne'e, arrepende ona sira ninia hahalok, hanesan negosiante ki'ik no laiha rendimentu fixu kada fulan, tribunál kondena kada arguidu no arguida sira ho pena prizaun tinan ida maibé suspende ba tinan ida.

### **8. Krime danu agravadu**

Nú. Prosesu : 0029/16.PDOEC  
Kompozisaun Tribunál : Koletivu  
Juis : Dr. João Ribeiro, Dra. Sribuana da Costa no Dr. Yudi Pamukas  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun tinan 1 suspende ba tinan 1

Iha 11 Jullu 2019, Tribunál Distritál Oekusi prezide julgamentu leitura akordaun ba krime danu agravadu ne'ebé envolve arguidu Agostinho Mauno hasoru lezadu Antonio Sila, iha Distritu Oekusi.

### **Akuzasaun Prokuradór**

Prokuradór akuza katak iha loron no fulan ne'ebé la apuradu maibé iha tinan 2015, arguidu tesi no sunu tiha lezadu nia ai-hun lulik ne'ebe bain-bain lezadu ba halo ritual (oho animál hanesan manu, bibi, fahi no karau hodi adora sira nia beiala sira). Arguidu tesi no sunu ai ne'e hodi halo to'os.

Prokuradór akuza arguidu kontra artigu 259 letra (e) KP kona-ba krime danu agravadu ho moldura penál tinan 2 to'o tinan 8 prizaun.

### **Produsaun ba prova sira**

Iha prosesu julgamentu, arguidu konfesa ba faktu hotu iha akuzasaun no deklarata katak nia sunu ai-hun ne'e tanba nia la hatene katak ai-hun ne'e lulik. Maibé depoisde akontesimentu arguidu husu deskulpa kedas ba lezadu no lori fahi ida no tua ba halo tuir kedas. Arguidu deklarata katak arrepende ninia hahalok ne'e no promete sei la halo tan iha futuru. Arguidu mós foin primeiravés

mai hatan iha tribunál no hanesan to'os-na'in ne'ebé laiha rendimentu fixu kada fulan no iha oan na'in haat.

Entretantu lezadu konfirma faktu sira iha akuzasaun no deklarata katak arguidu ho lezadu hela iha suku ida de'it no arguidu hatene hela kona-ba ai-hun lulik refere tanba lezadu sira sempre hamulak iha fatin refere. Lezadu haktuir katak arguidu tesi no sunu ai-hun lulik ne'e ho intensaun atu estraga jersaun uma lisan Fotes-Tahonis. Mezmu nune'e, lezadu konfirma kona-ba arguidu husu ona deskulpa liuhusi entrega fahi ida no tua hodi halo tuir fali estragus ne'ebé arguidu halo.

### **Alegasaun final**

Prokurador konsidera provadu komete faktu sira iha akuzasaun, nune'e, husu ba tribunál atu kondena arguidu tuir moldura penal ne'ebé previstu iha artigu 259 (e) KP.

Entretantu defeza husu ba tribunál atu fó pena ne'ebé kmaan ba arguidu tanba arguidu la hatene kona-ba ai-hun lulik refere, arrepende ona ninia hahalok, halo tuir ona liuhusi kustume Timor nian no promete sei la repete tan ninia hahalok hanesan iha futuru. Arguidu mós nu'udar agrikultór ne'ebé laiha rendimentu fixu kada fulan no iha responsabilidade ba familia.

### **Desizaun**

Tribunál prova katak arguidu tesi lezadu nia ai-hun lulik ne'ebé bain-bain lezadu halo ritual hodi adora sira nia beiala sira. Tribunál prova katak arguidu husu ona deskulpa ba lezadu no lori fahi ida no tua ba halo tuir fali estragus ne'ebé arguidu halo. Bazeia ba faktu provadu sira ne'e no tetu sirkunstansia hotu-hotu ne'ebé asosiadu ho krime ne'e, tribunál kondena arguidu ho pena prizaun tinan ida suspende ba tinan ida.

### **9. Krime abuzu seksuál ba ema ne'ebé labele reziste ho agravasaun**

Nú. Prosesu	: 0153/17.OESIC
Kompozisaun Tribunál	: Koletivu
Juis	: Dr. João Ribeiro, Dra. Sribuana da Costa no Dr. Yudi Pamukas
Prokurador	: Dr. Mateus Nessi
Defeza	: Dr. Calisto Tout
Desizaun	: Pena prizaun tinan 10

Iha 12 Jullu 2019, Tribunál Distritál Oekusi prezide julgamentu leitura akordaun ba krime abuzu seksuál ba ema ne'ebé la bele reziste ho agravasaun ne'ebé envolve arguidu AC hasoru lezada nu'udar nia tian, iha Distritu Oekusi.

### **Akuzasaun Prokurador**

Prokurador akuza katak iha 27 Jullu 2017, maizumenus iha oras tuku 19:00 kalan, lezada hemu tua-sabu butir rua hamutuk ho lezada nia la'en, mane foun na'in rua no oan mane bo'ot. Iha tuku 21:00 kalan, lezada lanu maka'as no lakohi ona atu kontinua hemu tua-sabu ne'e. Hafoin ida-ne'e, lezada nia la'en ho lezada nia oan mane bo'ot no lezada nia mane foun na'in rua ko'us lezada hodi ba hatoba tiha iha uma laran.

Liutiha minutu balun, bainhira lezada nia la'en ho nia oan mane ba tiha mate uma, arguidu nu'udar lezada nia subriñu (lezada nia la'en nia feton nia oan) tama ba uma laran no hi'it sa'e lezada nia lipa, kolu lezada nia kalsa no halo relasaun seksuál ho lezada ne'ebé iha kondisaun lanu todan. Lezada nia la'en filafali ba uma no ka'er toman arguidu halo hela relasaun seksuál ba lezada.

Prokuardór akuza arguidu kontra artigu 172 KP kona-ba violasaun seksuál no artigu 173(a) KP kona-ba agravasaun.

### **Produsaun ba prova sira**

Iha julgamentu, arguidu konfesa faktu parsialmente katak iha momentu ne'ebá sira hemu hamutuk tua iha lezada nia uma to'o lezada lanu todan. Hafoin, lezada nia la'en ho nia mane foun na'in rua ko'us lezada lori ba hatoba iha uma laran no arguidu fila ba nia uma. Maibé tanba nia telefone lakon nune'e arguidu filafali ba iha lezada nia uma hodi buka nia telefone ne'e. Arguidu hatutan katak bainhira lezada nia la'en filafali mai uma, haree arguidu iha li'ur la'os iha uma-laran. Tanba ne'e, arguidu rejeita kona-ba halo relasaun seksuál ho lezada.

Entretantu lezada deklara katak momentu ne'ebá lezada hemu tua sabu hamutuk ho lezada nia la'en no mane foun na'in rua la'os hemu ho arguidu. Lezada hatutan katak iha momentu ne'ebá lezada lanu todan nune'e lezada la sente bainhira arguidu halo relasaun seksuál ho lezada. Lezada nia la'en mak konta tuir fali akontesimentu ne'e ba lezada. Lezada haktuir tan katak distánsia arguidu nia uma ho lezada nia uma maizumenus metru 200.

Testemuña CQ nu'udar lezada nia la'en depoimenta katak arguidu la hemu hamutuk ho sira. Maibé depoisde hatoba tiha lezada iha uma-laran mak arguidu ba iha sira nia uma no la kleur deit arguidu fila ona. Testemuña mós la hatene arguidu fila ba ne'ebé. Depoisde arguidu fila ne'e mak testemuña ho sira seluk ba hadeer iha mate uma, maibé iha dalan klaran testemuña derepente sente fuan la hakmatek no mesak fila ba uma.

To'o iha uma, testemuña tama ba uma laran no haree arguidu halo hela relasaun seksuál ho lezada. Tanba ne'e testemuña basa dala neen iha arguidu nia hasan sorin karuk no loos. Testemuña sai ba li'ur no taka tiha odamatan atu buka tali kesi arguidu maibé arguidu sobu tiha didin uma nian no halai lakon tiha. Arguidu husik hela nia siñelus no kamizola iha uma laran. Testemuña mós deklara katak arguidu nu'udar nia feton ninia oan mane no hela besik ho sira ho distánsia maizumenus metru 300.

Hafoin produsaun ba prova sira, tribunál konsidera arguidu komete krime ne'e hasoru lezada ne'ebé ho kondisaun lanu no la hatene-an. Tanba ne'e, bazeia ba artigu 274 KPP kona-ba alterasaun ba kualifikasaun jurídiku, tribunál halo alterasaun husi violasaun seksuál ba fali iha artigu 179 KP kona-ba abuzu seksuál ba ema ne'ebé labele reziste no mantein artigu 182 Nú. 1(d) KP kona-ba agravasaun tanba arguidu no lezada sei iha relasaun família. Alterasaun ne'e, hetan konkordánsia husi parte prokuradór no defeza.

### **Alegasaun final**

Prokuradór konsidera arguidu provadu komete krime abuzu seksuál ba ema ne'ebé labele reziste tuir faktu iha akuzasaun tanba arguidu aproveita halo relasaun seksuál ho lezada ne'ebé ho

kondisaun lanu no la hatene-an. Prokuradór haktuir katak iha produsaun ba prova arguidu rasik tenta atu bosok tribunál katak nia la halo relasaun seksuál ho lezada. Aleinde ne'e, tuir loloos arguidu mak tenke respeita lezada tanba lezada nu'udar arguidu nia tian. Ho razaun hirak ne'e hotu, husu ba tribunál atu kondena arguidu tuir pena ne'ebé hakerek ona iha artigu 179 KP no 182 Nú. 1(d) KP.

Entretantu defeza husu ba tribunál atu fi'ar liu ba arguidu nia deklarasaun katak la halo relasaun seksuál ho lezada ne'ebé mós reforsa ho lezada nia deklarasaun katak la hatene kona-ba akontesimentu refere. Ho razaun ne'e, husu ba tribunál atu absolve arguidu husi krime refere maibé karik tribunál iha hanoin seluk, parte defeza husu justisa ba arguidu.

### **Desizaun**

Tribunál prova arguidu halo relasaun seksuál ho lezada maski lezada rasik la hatene kona-ba akontesimentu ne'e tanba lanu todan maibé lezada nia la'en haree ho matan akontesimentu ne'e. Tribunál mós prova katak arguidu primeiravés mai hatan iha tribunál no nu'udar estudante.

Aleinde prova sira ne'e, tribunál konsidera katak arguidu hatene katak lezada nu'udar nia tian ka feen husi arguidu nia tiun rasik maibé aproveita lezada nia kondisaun lanu todan ne'e hodi halo aktu ne'e. Arguidu mós la arrepende ninia hahalok tanba tenta atu bosok tribunál. Bazeia ba faktu provadu sira ne'e no tetu mós ba sirkunstánsia hotu-hotu, tribunál konklui prosesu ne'e no kondena arguidu ho pena prizaun tinan sanulu.

### **10. Krime ofensa ba integridade fízika simples ho natureza violénsia doméstika no krime ameasa**

Nú. Prosesu	: 0049/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Marcelino Marques Coro
Desizaun	: Pena multa US\$120.00

Iha 22 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika no krime ameasa ne'ebé envolve arguidu AL hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 13 Marsu 2018, maizumenus iha oras tuku 12:00 meiodia, iha merkadu, arguidu basa lezada dala ida iha hasan loos no dala ida iha hasan karuk. Aktu ne'e rezulta lezada sofre moras iha hasan loos no karuk. Arguidu mós ameasa sei baku mate lezada. Aktu ne'e akontese bainhira arguidu rona katak lezada trata bolsa da mãe ba sira nia oan iha Banku BNCTL sein koñesimentu husi arguidu tanba sira separadu ona nu'udar feen ho la'en. Depoisde akontesementu ne'e lezada ba halo tratamentu iha Ospital Referal Oekusi. Aleinde relatóriu médiku ne'e, iha akuzasaun ne'e anexa mós fotografia kondisaun lezada nia hosi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa konjuga ho artigu 2, 3(a), 35(b) no 36 LKVD no artigu 157 KP kona-ba krime ameasa ho moldura penál to'o tinan 1 prizaun ka multa.

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa konsiliaun, tribunál halo tentativa konsiliaun ba arguidu no lezada relasiona ho krime ameasa tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste tiha nia keixa hasoru arguidu. Bazeia ba konkordánsia husi parte rua ne'e, tribunál omologa tiha keixa ne'e. Entretantu ba krime ofensa ba integridade fízika simples ho natureza violénsia doméstika, tribunál kontinua prosesa liuhusi julgamentu.

### **Produsaun prova sira**

Iha julgamentu, arguidu konfesa faktu sira hotu iha akuzasaun prokuradór nian no deklara katak arrepente ninia hahalok. Arguidu hateten katak hatene kuandu baku ema bele rezulta moras ka kanek maibé arguidu nafatin halo agresaun ne'e hasoru lezada. Arguidu hatutan katak dame malu ona ho lezada, foin primeiravés halo krime hasoru lezada no mai hatan iha tribunál. Arguidu iha oan na'in tolu, arguidu serbisu nu'udar funsionáriu ho rendimentu kada fulan US\$204.00.

Entretantu lezada konfirma hotu faktu sira iha akuzasaun prokuradór nian no deklara katak antes problema ne'e akontese sira moris ketak-ketak maibé agora sira moris hamutuk filafali ona hanesan feen-la'en.

### **Alegasaun finál**

Prokuradór konsidera arguidu provadu komete agresaun fízika hasoru nia feen tuir faktu sira iha akuzasaun. Prokuradór reforsa liután katak tuir loloos arguidu agradese tanba lezada iha hanoin diak ajuda arguidu trata bolsa ba maen labarik sira nia atu sustenta sira nia família maibé pelu kontráriu arguidu halo fali agresaun hasoru lezada. Ho razaun ne'e, mezmú arguidu ho lezada dame malu ona maibé atu prevene arguidu nia hahalok iha futuru, husu ba tribunál atu kondena arguidu tuir moldura penál iha artigu 145 KP.

Entretantu defeza husu ba tribunál atu aplika pena multa ba arguidu tanba arguidu konfesa integralmente ba faktu sira iha akuzasaun, arrepente ninia hahalok no moris hamutuk fali ona ho lezada hanesan feen ho la'en. Aleinde ne'e, arguidu foin primeiravés hatan iha tribunál, iha oan na'in tolu no arguidu hanesan funsionáriu ho rendimentu kada fulan US\$204.00.

### **Desizaun**

Tribunál prova katak arguidu basa lezada dala ida iha hasan loos no dala ida iha hasan karuk. Tribunál konsidera arguidu prátika hahalok ne'e ho intensaun tanba arguidu hatene hela katak baku ema ne'e kontra lei. Tribunál mós konsidera sirkunstánsia atenuante sira hanesan arguidu konfesa, arrepente ninia hahalok, dame malu ona ho lezada, foin primeiravés hatan iha tribunál, iha oan na'in tolu no serbisu nu'udar funsionáriu públiku ho rendimentu kada fulan US\$204.00.

Bazeia ba faktu provadu sira no tetu sirkunstánsia hotu-hotu ne'ebé asosiadu ho krime ne'e, tribunál kondena arguidu ho pena multa US\$120.00 ne'ebé arguidu sei selu US\$1.00 kada loron durante loron 120. Tribunál mós kondena arguidu selu kustu judisiál US\$20.00. Bainhira arguidu la selu pena multa ne'e, arguidu sei kumpri iha prizaun durante loron 80 nu'udar pena alternativu.

### **11. Krime ofensa ba integridade fízika simples ho natureza violénsia doméstika**

Nú. Prosesu : 0022/18.OEOSL  
Kompozisaun Tribunál : Singulár  
Juis : Dr. João Ribeiro  
Prokuradór : Dr. Mateus Nessi  
Defeza : Dr. Marcelino Marques Coro  
Desizaun : Pena prizaun tinan 1 suspende ba tinan 1

Iha 22 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JA hasoru nia feen, iha Distritu Oekusi.

#### **Akuzasaun Prokuradór**

Prokuradór akuza katak iha 07 Dezembru 2018, maizumenus iha tuku 20:00 kalan, arguidu basa dala ida iha lezada nia hasan parte karuk no buti iha lezada nia kakorok. Aktu ne'e rezulta bubu, mean no moras iha lezada nia hasan no kakorok. Hafoin akontesimentu, lezada ba halo tratamentu médiku iha sentru saúde no fotografia husi Polísia-VPU ba lezada nia kondisaun ne'ebé mós aneksa iha akuzasaun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 prizaun ka multa konjuga ho artigu 2, 3(a), 35(b) no 36 LKVD.

#### **Produsaun ba prova sira**

Arguidu konfesa integralmente ba faktu iha akuzasaun no deklarata katak arrepende ninia hahalok. Arguidu mós deklarata katak dame malu ona ho lezada no moris hamutuk nafatin hanesan feen ho la'en. Arguidu hatutan katak foin primeiravés halo krime no serbisu hanesan to'os-na'in ne'ebé laiha rendimentu fixu kada fulan no iha oan na'in tolu.

Tribunál presinde lezada nia deklarasaun tanba arguidu konfesa integralmente ba faktu iha akuzasaun.

#### **Alegasaun finál**

Prokuradór hanoin katak arguidu provadu halo duni agresaun fízika hasoru nia feen liuhusi basa dala ida iha lezada nia hasan parte karuk no buti dala ida iha lezada nia kakorok. Tanba ne'e, prezisa iha prevensaun atu evita arguidu repete nia hahalok iha futuru. Aleinde ne'e, tanba krime violénsia doméstika maioria akontese maka'as iha Rejiaun Oekusi kompara ho munisípiu sira seluk, husu ba tribunál atu kondena arguidu tuir pena iha artigu 145 KP.

Entretantu defeza husu ba tribunál atu fó pena ne'ebé kmaan ba arguidu tanba iha produsaun ba prova sira arguidu konfesa, arrepende ninia hahalok no di'ak malu ona ho lezada. Arguidu mós

foin primeiravés mai hatan iha tribunál, kolabora di'ak ho tribunál no arguidu iha oan na'in tolu ne'ebé arguidu mak responsabiliza.

### **Desizaun**

Depoizde avalia faktu sira hotu, tribunál prova katak arguidu basa duni lezada dala ida iha hasan parte karuk no buti dala ida iha kakorok. Tribunál mós konsidera katak arguidu ninia hahalok ne'e grave tanba halo hasoru nia feen ne'ebé tuir loos arguidu proteje.

Bazeia ba faktu provadu hirak iha leten no tetu ba sirkunstánsia atenuante sira hanesan arguidu konfesa, arrepende ninia hahalok no di'ak malu ona ho lezada, tribunál kondena arguidu ho pena prizaun tinan ida suspende nia ezekusaun ba período hanesan.

### **12. Krime ofensa ba integridade fízika simples ho natureza violénsia doméstika**

Nú. Prosesu : 0004/19.OESIC  
Kompozisaun Tribunál : Singulár  
Juis : Dr. João Ribeiro  
Prokuradór : Dr. Mateus Nessi  
Defeza : Dr. Calisto Tout  
Desizaun : Pena prizaun tinan 1 maibé suspende ba tinan 1

Iha 23 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RTC hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 03 Janeiru 2019, maizumenus iha oras tuku 20:00 kalan, arguidu ho lezada istori-malu no arguidu tebe dala ida iha lezada nia liman karuk, rakut lezada nia fu'uk, buti dala ida iha lezada nia kakorok no tebe lezada nia kidun dala rua. Aktu hirak ne'e, rezulta lezada sofre isin bubu, mean no moras iha lezada nia liman, ulun, kakorok no kidun. Hafoin akontesimentu ne'e, lezada ba halo tratamentu iha PRADET no iha mós fotografía kona-ba lezada nia kondisaun fízika husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu sira parsialmente katak tebe dala ida duni iha liman karuk no tebe dala rua iha kidun maibé la rakut lezada nia fu'uk no la buti lezada iha kakorok. Arguidu hateten katak nia hatene katak baku ema bele hamosu moras ka kanek ba ema nia isin-loloon. Maski nune'e, arguidu arrepende ninia hahalok ne'e no iha tribunál nia oin arguidu husu ba lezada atu moris hamutuk filafali ho arguidu tanba hafoin akontesimentu sira hela separadu to'o agora. Arguidu mós deklarara katak foin primeiravés baku lezada no mai hatan iha tribunál no arguidu serbisu nu'udar seguransa sivíl ho vensimentu kada fulan US\$130.00.



Entretantu lezada konfirma faktu hotu iha akuzasaun no deklarara katak loos duni depoisde akontesimentu, sira hela separadu to' o agora. Lezada mos simu arguidu nia pedidu ne' ebe husu atu sira moris hamutuk filafali nu' udar feen-la' en tanba sira iha oan na' in ida ona.

### **Alegasaun final**

Prokurador konsidera arguidu provadu halo agresaun fizika hasoru nia feen tuir faktu sira iha akuzasaun. Mezmu iha produsaun ba prova arguidu konfesa ba faktu balun de' it maibe prokurador husu tribunál atu konsidera liu ba lezada nia deklarasaun. Prokurador reforsa liutan katak krime violensia domestik maoria akontese iha Rejiaun Oekusi kompara ho munisipiu sira seluk. Tanba ne' e atu halo prevensaun iha futuro, husu ba tribunál atu kondena arguidu ho pena ne' ebe previstu iha artigu 145 KP.

Entretantu, defeza husu ba tribunál atu fi' ar liu ba arguidu nia deklarasaun tanba arguidu deklarara ho onestu katak arguidu tebe lezada nia liman dala ida no tebe dala rua iha kidun. Aleinde ne' e, arguidu kolabora di' ak ho tribunál, arrepende ona ninia hahalok no foin primeiraves halo krime. Arguidu mos iha oan na' in ida no iha responsabilidade ba familia. Arguidu hanesan seguransa sivil ho rendimentu kada fulan US\$130.00. Tanba ne' e, husu ba tribunál atu aplika pena ne' ebe justu ba arguidu.

### **Desizaun**

Tribunál prova katak arguidu provadu halo duni agresaun fizika hasoru lezada no kondena arguidu nia hahalok ne' e tanba arguidu ho intensaun halo krime hasoru nia feen ne' ebe tuir loloos arguidu mak tenke fo protesau. Tribunál tetu mos sirkunstansia atenuante sira hanesan arguidu arrepende ona ninia hahalok, foin primeiraves mai iha tribunál no dame malu ona ho lezada.

Bazeia ba faktu provadu sira no tetu ba sirkunstansia sira ne' e, tribunál kondena arguidu ho pena prizaun tinan ida suspende ba tinan ida no kondena arguidu selu kusta judisial US\$20.00.

### **13. Krime ofensa ba integridade fizika simples ho natureza violensia domestik**

Nú. Prosesu	: 0001/19.OESIC
Kompozisaun Tribunál	: Singulár
Juis	: Dr. João Ribeiro
Prokurador	: Dr. Mateus Nessi
Defeza	: Dr. Calisto Tout
Desizaun	: Pena prizaun tinan 1 suspende ba tinan 1

Iha 24 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fizika simples ho natureza violensia domestik ne' ebe envolve arguidu FL hasoru nia feen, iha Distritu Oekusi.

### **Akuzasaun Prokurador**

Prokurador akuza katak iha 01 Janeiro 2019, maizumenus iha tuku 14:30 lokraik, arguidu ho lezada diskute-malu kona-ba arguidu bandu lezada atu ba fo boas-festas ba lezada nia familia. Arguidu basa lezada dala ida iha ulun parte karuk, tuku dala rua iha ulun parte karuk, tebe dala tolu iha kotuk laran no basa dala ida iha hasan parte loos. Agresaun fizika ne' e resulta lezada hetan bubu, mean no moras iha hasan karuk, hasan loos, ulun no kotuk laran. Hafoin

akontesimentu ne'e, lezada ba halo tratamentu iha PRADET. Aleinde relatóriu médiku husi PRADET, iha akuzasaun ne'e anexa mós fotografía husi Polísia-VPU ba lezada nia kondisaun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 prisaun ka multa no konjuga ho artigu 2, 3(a), 35(b) no 36 LKVD.

### **Produsaun prova sira**

Arguidu konfesa faktu sira iha akuzasaun no deklara arrepende ninia hahalok. Arguidu hatutan katak foin primeiravés halo krime hasoru lezada, iha oan na'in rua, dame malu ona ho lezada to'o agora. Arguidu mós promete katak sei la halo tan krime hasoru nia feen ka ema seluk iha futuro.

Entretantu lezada konfirma faktu hotu iha akuzasaun prokuradór nian no deklara katak depoisde akontesimentu ne'e, lezada ho arguidu dame malu ona no kontinua moris hamutuk hanesan feen-la'en.

### **Alegasaun final**

Prokuradór konsidera arguidu provadu ho intensaun baku, tuku no tebe dala barak hasoru lezada. Bazeia ba faktu sira ne'e no atu halo prevensaun ba iha futuro, husu ba tribunál atu kondena arguidu ho pena ne'ebé previstu iha artigu 145 KP.

Entretantu defeza haktuir katak arguidu konfesa faktu sira hotu iha akuzasaun, arrepende ninia hahalok no di'ak malu ona ho lezada. Arguidu kolabora di'ak ho tribunál, laiha rendimentu fixu tanba arguidu dezempregadu, sira iha oan na'in rua no promete sei la halo tan krime hanesan hasoru nia membru família ka ema seluk iha future. Reflete ba situasaun sira ne'e hotu, defeza husu ba tribunál atu aplika pena ne'ebé justu no adekuadu ba arguidu.

### **Desizaun**

Tribunál konsidera arguidu provadu ho intensaun halo agresaun fízika hasoru lezada tuir faktu sira iha akuzasaun. Tribunál tetu mós ba arguidu nia konfisaun, arrepende ona ninia hahalok, dame malu ona ho lezada, primeiravés halo krime no iha oan na'in rua.

Bazeia ba faktu provadu sira ne'e no tetu ba sirkunstánsia hotu-hotu ne'ebé asosiadu ho krime ne'e, tribunál kondena arguidu ho pena prizaun tinan ida suspende ba tinan ida.

### **14. Krime ofensa ba integridade fízika simples ho natureza violénsia doméstika**

Nú. Prosesu	: 0221/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Calisto Tout
Desizaun	: Pena prizaun tinan 1 fulan 6 suspende ba tinan 1 fulan 6

Iha 24 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ZC hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 30 Dezembru 2018, maizumenus iha oras tuku 23:00 kalan, arguidu ho lezada diskute-malu tanba lezada subar tiha xave motor nian. Hafoin arguidu basa dala ida iha lezada niaibun rezulta kanek, ran no moras. Arguidu kontinua dudu lezada monu ba iha rai rezulta moras iha nia isin. Liutiha akontesimentu ne'e, lezada ba halo tratamentu iha Ospital Referal Oekusi no iha akuzasaun aneksa mós ho lezada nia fotografia ne'ebé fornese husi VPU - Polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa integralmente ba faktu sira hotu iha akuzasaun no deklarata katak arrepende ninia hahalok. Arguidu mós deklarata katak dame malu ona ho lezada no kontinua moris hamutuk hanesan feen ho la'en. Arguidu hatutan katak foim primeiravés halo krime hasoru nia feen no mai hatan iha tribunál, iha oan na'in rua no serbisu hanesan funsionáriu ho rendimentu kada fulan US\$200.00.

Lezada kontinua konfirma faktu sira iha akuzasaun no deklarata katak lezada subar xave motor ho intensaun atu arguidu labele la'o sai tanba kalan bo'ot ona.

### **Alegasaun final**

Prokuradór konsidera faktu sira iha akuzasaun prokuradór nian provadu hotu. Prokuradór reforsa katak lezada hadomi duni nia la'en nune'e lakohi atu arguidu lao sai iha tempu kalan atu bele iha uma no hamutuk ho família. Maibé pelu kontráriu arguidu halo fali agresaun hasoru lezada. Tanba ne'e, husu ba tribunál atu kondena arguidu tuir pena iha artigu 145 KP.

Entretantu defeza husu ba tribunál atu fó pena ne'ebé adekua ba arguidu tanba arguidu konfesa, arrepende ninia hahalok, di'ak malu ona ho lezada, kolabora diak ho tribunál no arguidu iha oan na'in rua ne'ebé nia tenke responsabiliza. Arguidu serbisu hanesan funsionáriu ho rendimentu kada fulan US\$200.00.

### **Desizaun**

Tribunál prova katak arguidu ho intensaun basa lezada dala ida no dudu monu lezada ba iha rai. Tribunál tetu mós ba sirkustánsia atenuante sira hanesan arguidu arrepende, dame malu ona ho lezada no iha oan na'in rua. Bazeia ba faktu provadu no sirkunstánsia sira hotu, tribunál konklui prosesu ne'e no kondena arguidu ho pena prizaun tinan ida fulan neen suspende ba período hanesan. Tribunál kondena mós arguidu selu kustu judisiál US\$30.00.

### **15. Krime ofensa ba integridade física simples ho natureza violénsia doméstika**

Nú. Prosesu	: 0210/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Calisto Tout

Desizaun

: Pena prizaun tinan rua no suspende ba tinan rua

Iha 24 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DCS hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 09 Dezembru 2018, maizumenus iha oras tuku 20:00 kalan, arguidu tebe dala ida iha lezada nia ain-kabun parte loos, basa dala rua iha hasan parte loos, tuku dala haat iha kanuruk. Arguidu mós uza kadeira masa baku dala ida iha lezada nia liman-sikun loos no lori ai-sar baku dala ida iha matan fukun parte loos. Arguidu nia hahalok rezulta lezada hetan bubu, mean no moras iha ain kabun, hasan, kanuruk, liman-sikun no matan fukun. Tanba ne'e lezada tenke ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 prizaun ka multa konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu sira hotu iha akuzasaun, arrepende ninia hahalok, foin primeiravés mai hatan iha tribunál, di'ak malu ona ho lezada no sira iha oan na'in haat. Arguidu serbisu hanesan natar-nain no laiha rendimentu fixu ba kada fulan.

Tribunál deside la rona ona lezada nia deklarasaun tanba arguidu konfesa ona ba faktu sira iha prokuradór nia akuzasaun.

### **Alegasaun final**

Prokuradór konsidera arguidu provadu komete faktu sira iha akuzasaun. Aleinde ne'e, konsidera katak husi arguidu nia maneira baku lezada dala barak hatudu katak arguidu la'os primeiravés halo krime ne'e maibé sempre halo agresaun hasoru lezada. Tanba ne'e, tenke iha prevensaun atu arguidu la repete ninia hahalok iha futuru, husu ba tribunál atu kondena arguidu tuir pena iha artigu 145 KP.

Entretantu defeza husu ba tribunál atu fó pena ne'ebé kmaan ba arguidu tanba iha produsaun ba prova arguidu konfesa integralmente ba faktu, arrepende ninia hahalok, di'ak malu ona ho lezada, foin mai hatan iha tribunál no promete sei la repete tan hahalok hanesan iha futuru. Arguidu iha oan na'in haat no arguidu mak responsabiliza hotu.

### **Desizaun**

Tribunál prova katak arguidu tebe dala ida iha lezada nia ain-kabun parte loos, basa dala rua iha hasan parte loos, tuku dala haat iha kanuruk, arguidu mós uza kadeira masa baku dala ida kona iha lezada nia liman sikun loos no lori ai-sar baku dala ida iha matan fukun parte loos.

Tribunál mós tetu ba sirkunstánsia atenuante sira hanesan arguidu konfesa, arrepende, di'ak malu ona ho lezada, promete sei la halo tan iha futuru, primeiravés mai hatan iha tribunál iha oan na'in haat, laiha rendimentu fixu no nu'udar responsavél prinsipál ba família.

Bazeia ba faktu provadu sira no tetu sirkunstánsia sira ne'e, tribunál kondena arguidu ho pena prizaun tinan rua suspende nia ezekusaun ba período hanesan.

### **16. Krime ofensa ba integridade fízika simples ho natureza violénsia doméstika**

Nú. Prosesu : 0012/19.OESIC  
Kompozisaun Tribunál : Singulár  
Juis : Dr. João Ribeiro  
Prokuradór : Dr. Mateus Nessi  
Defeza : Dr. Calisto Tout  
Desizaun : Pena admoestasaun

Iha 24 Jullu 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FC hasoru nia feen EE, iha Distritu Oekusi.

#### **Akuzasaun Prokuradór**

Prokuradór akuza katak iha 24 Janeiru 2019, maizumenus iha oras tuku 18:00 lorokraik, arguidu basa dala ida iha lezada nia hasan loos no tuku dala ida iha ulun parte kanuruk. Aktu ne'e rezulta lezada sofre moras iha nia hasan no ulun nune'e, tenke ba halo tratamentu médiku iha Ospital Referral Oekusi no aneksa mós ho fotografia kona-ba lezada nia kondisaun husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prisaun ka multa konjuga ho artigu 2, 3(a), 35(b) no 36 LKVD.

#### **Produsaun prova sira**

Iha prosesu julgamentu, arguidu konfesa faktu sira hotu iha akuzasaun no deklara katak arguidu nu'udár motorista nune'e iha dadeer antes arguidu lori sai kareta, arguidu hameno ona ba lezada atu la bele lori sira nia oan ba li'ur tanba labarik foin fulan tolu ho balun no momentu ne'ebá tempu udan. Maibé lezada lori labarik ba iha merkadu no bainhira fila mai uma labarik moras kedas. Arguidu mós deklara katak arrepende ninia hahalok no promete sei la halo tan krime hasoru nia feen. Arguidu hatutan katak hafoin de akontesimentu, arguidu ho lezada dame malu kedas no hela hamutuk nafatin to'o agora. Arguidu foin primeiravés mai hatan iha tribunál no iha oan na'in rua.

Entretantu lezada kontinua konfirma hotu faktu sira iha akuzasaun inklui konfirma arguidu nia deklarasaun kona-ba sira di'ak malu ona to'o agora.

#### **Alegasaun final**

Prokuradór konsidera arguidu provadu halo agresaun fízika hasoru nia feen tuir faktu sira iha akuzasaun prokuradór nian. Tanba ne'e konsidera katak krime violénsia doméstika barak liu akontese iha Rejiaun Oekusi kompara ho munisípiu sira seluk, husu ba tribunál atu kondena arguidu tuir pena ne'ebé hakerek ona iha artigu 145 KP.

Entretantu, defeza haktuir katak arguidu konfesa faktu sira hotu iha akuzasaun no konsidera arguidu nia agresaun hirak ne'e tanba preokupa ho sira nia oan nia saúde. Arguidu ho lezada dame malu ona, arguidu arrepende ona ninia hahalok no promete sei la halo tan krime hasoru nia

membru família ka ema seluk iha futuru. Arguidu mós kolabora di'ak ho tribunál no iha oan na'in rua. Tanba ne'e, husu ba tribunál atu aplika pena ne'ebé kmaan ba arguidu tuir nia sala.

### **Desizaun**

Iha leitura sentensa tribunál prova katak arguidu basa dala ida iha lezada nia hasan loos no tuku dala ida iha ulun parte kanuruk. Bazeia ba faktu provadu hirak ne'e inklui sirkunstánsia sira hanesan arguidu konfesa, arrepende ninia hahalok, di'ak di'ak malu ona ho lezada no promote sei la repete iha futuru. Arguidu mós iha oan na'in rua, primeiravés halo krime no mai hatan iha tribunál no arguidu laiha rendimentu fixu ba kada fulan.

Bazeia ba faktu provadu sira ne'e no haree ba sirkunstánsia hotu-hotu ne'ebé asosiadu iha krime ne'e, tribunál konklui kondena arguidu ho pena admoestasaun.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

Diresaun e-mail: [santos.cas76@gmail.com](mailto:santos.cas76@gmail.com)

Website : <http://jsmp.tl>

Telefone: 3323883